

Слава Святей, и Единосушной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков.

Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеви со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи возвах

Глас 7. Господи, возвах к Тебе, услыши мя.

Господи, возвах к Тебе, услыши мя. Услыши мя Господи. Господи, возвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку мою, жертва вечерняя. Услыши мя Господи.

Воскресны стихиры

Стих: Изведи из темницы душу мою, исповедатися имени Твоему.

Приидите, возрадуемся Господеви, сокрушившему смерти державу, и просветившему человеческий род, со Безплотными зовуще: Содетелю и Спасе наш, слава Тебе.

Стих: Мене ждут праведницы, дондеже воздаси мне.

Крест претерпел еси Спасе, и погребение нас ради, смертью же яко Бог смерть умертвил еси. Темже поклоняемся тридневному воскресению Твоему: Господи, слава Тебе.

Стих: Из глубины возвах к Тебе Господи, Господи, услыши глас мой.

Апостоли видевше воскресение Содетеля, чудяхуся, поюще хвалу Ангельскую: сия слава есть церковная, сие богатство Царствия: пострадавый нас ради, Господи, слава Тебе.

Стих: Да будут уши Твои, внимлюще гласу моления моего.

Господи, аще и Иоанну предстал еси на Иордане яко Человек, но не отступил

еси от престола, со Отцем седяй, и, крещен нас ради, мир свободил еси от работы чуждаго, яко Щедр и Человеколюбец.

Стих: Аще беззакония назриши Господи, Господи, кто постоит Яко у Тебе очищение есть.

Господи, аще и Иорданскими водами обложился еси яко Человек, но свидетельствовался еси свыше снтием Духа, и глас Отець Сына Тя свидетельствова, но явился и подаждь нетление душам нашим.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Господи, Ты, от Отца прежде веков рождейся непременный, пришел еси в последняя лета, и зрак раба приял еси, и образ Твой, яко Зиждитель обновил еси, крестився бо, даровал еси нетление душам нашим.

Ины стихиры Креста (Триоди) . глас 5

Стих: От стражи утренния до ноши, от стражи утренния, да уповает Израиль на Господа.

Возсияй Господень Кресте, светолучныя молния Твоя благодати, в сердца чтущих Тя, и Богоприятною любовью приемлющих, Миротвожденне, имже слезное потребися сетование, и смертных сетей избавихомся, и к присному веселию приидохом. Покажи красоты Твоя благолепие, воздаяние подаждь воздержания рабом Твоим, верно просящим Твое богатное заступление, и велию милость.

Стих: Яко у Господа милость, и многое у Него избавление, и Той избавит Израиля от всех беззаконий его.

Радуйся Живоносный Кресте, Церкви красный раю, древо нетления, прозябшее нам вечныя славы наслаждение: имже бесовстии отгоняются полцы, и ангельстии свеселятся чинове, и совокупления верных празднуют. Оружие непобедимое, утверждение нерушимое, верных победы, священников похвало, Христовы ныне страсти и нам подаждь достигнути, и велию милость.

Стих: Хвалите Господа вси языцы, похвалите Его вси людие.

Радуйся Живоносный Кресте, благочестия непобедимая победа, дверь райская, верных утверждение, Церкви ограждение: имже тля разорися и упразднися, и попрося смертная держава, и вознесохомся от земли к Небесным: оружие непобедимое, бесов сопротивоборче, славо мученков, преподобных яко воистинну удобрение, пристанище спасения, даруяй миру велию милость.

Стих: Яко утвердися милость Его на нас, и истина Господня пребывает во век.

Гряди первозданная двоице, лика отпадшая горних, завистию човекоубийцы, горькою сластию древа, древле вкушением. се всечестное воистинну древо предгрядет, к немуже притекше радостию облобызайте, и возопийте к нему с верою: Ты наше воззвание, Кресте всечестный, древо Богоблаженное, саде Небесный: егоже плода причастившися, нетление уллучихом, едема первого приемше известно, и велию милость.

Слава, глас 3

Христе Боже наш, вольное распятие во общее Воскресение рода человеческого восприемый, и тростию Креста, обагрением червленым Своя персты окровавивый, оставительная нам царски подписати човеколюбствовавый, не презри нас бедствующих, и паки от Тебе разстояние: но ущедри Едине Долготерпеливе, во обстоянии люди Твоя, и востани, побори борющия ны, яко Всесилен.

И ныне, глас 7, Догматик:

Мати убо позналася еси, паче естества, Богородице, пребыла же еси Дева, паче слова и разума: и чудесе Рождества Твоего сказати язык не может. Преславно бо сущу зачатую Чистая, непостижен есть образ рождения: идеже бо хочет Бог,

побеждается естества чин. Темже Тя вси, Матерь Божию ведуще, молим Ти ся прилежно, моли спастися душам нашим.

Вечерний вход

Премудрость. Прости.

Свете тихий святых славы, Безсмертнаго, Отца Небеснаго, Святаго Блаженнаго, Иисусе Христе! Пришедше на запад солнца, видевше свет вечерний, поем Отца, Сына и Святаго Духа, Бога. Достоин еси во вся времена пет быти гласы преподобными, Сыне Божий, живот даяй, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, Господь воцарися, в лепоту облечеса.

Стих: Облечеса Господь в силу и препоясаса.

Стих: Ибо утверди вселенную, яже не подвижится.

Стих: Дому Твоему подобает святыня, Господи, в долготу дний.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобает хвала. Тебе подобает пение, Тебе слава подобает, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

На стиховне стихиры воскресные, глас 7-й:

Воскресл еси из гроба Спасе мира, и совоздвигл еси человеки с плотию Твоею: Господи, слава Тебе.

Стих: Господь воцарися, в лепоту облечеса.

Воскресшему из мертвых, и просветившему вся, приидите поклонимся: от адова бо мучительства нас свободил еси, своим тридневным Воскресением живот нам даровавый, и велию милость.

Стих: Ибо утверди вселенную, яже не подвижется.

Во ад сошед Христе, смерть пленил еси, и тридневен воскрес, нас совоскресил еси, славящих Твое всесильное востание, Господи Человеколюбче.

Стих: Дому Твоему подобает святыня, Господи, в долготу дний.

Страшен явился еси Господи, во гробе лежа яко спя, воскрес же тридневен яко силен, Адама совоскресил еси зовуща: слава Воскресению Твоему, Едине Человеколюбче.

Слава и ныне, глас 4, Триоди (Кресту)

Пособивый Господи кроткому Давиду победити иноплеменника, верным людем нашим споборствуй, и оружием Креста низложи враги наша: покажи Благоутробне на нас древния милости Твоя, и да разумеют воистинну, яко Ты еси Бог: и на Тя надеющиеся побеждаем, молящиеся обычно пречистей Твоей Матери, дароватися нам велицей милости.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святыи Боже, Святыи Крепкий, Святыи Безсмертныи, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святый, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь:

Богородице, Дево, радуйся, Благодатная Марие, Господь с Тобою; благословенна Ты в женах и благословен Плод чрева Твоего, яко Спаса родила еси душ наших (дважды).

И тропарь Кресту, глас 1:

Спаси Господи люди Твоя, и благослови достояние Твое, победы православным Христианом на сопротивных даруя, и Твое сохраняя Крестом Твоим жительство.

Буди имя Господне благословенно от ныне и до века (трижды).

33-й псалом

Благословлю Господа на всякое время, выну хвала Его во устех моих.

О Господе похвалится душа моя: да услышат кротцыи и возвеселятся.

Возвеличите Господа со мною, и вознесем имя Его вкупе.

Взысках Господа, и услыша мя, и от всех скорбей моих избави мя.

Приступите к Нему, и просветитесь, и лица ваша не постыдятся.

Сей нищий воззва, и Господь услышай, и от всех скорбей Его спасе и.

Ополчится Ангел Господень окрест боящихся Его, и избавит их.

Вкусите и видите, яко благ Господь: блажен муж, иже уповае на Нань.

Бойтесь Господа вси святии Его, яко несть лишения боящимся Его.

Богатии обнищаша и взалкаша: взыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).

Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози востают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни возвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забываяй всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Миром Господу помолимся...

Бог Господь

Бог Господь и явился нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 7

Разрушил еси Крестом Твоим смерть, отверзл еси разбойнику рай; мирноносицам плач преложил еси и Апостолом проповедати повелел еси, яко воскресл еси, Христе Боже, даруяй миру велию милость. (дважды)

Слава, Кресту, глас 1:

Спаси Господи люди Твоя, и благослови достояние Твое, победы православным Христианом на сопротивных даруя, и Твое сохраняя Крестом Твоим жительство

И ныне, Богородичен, глас 1:

Гавриилу, вещавшу Тебе, Дево, радуйся, со гласом воплощашеся всех Владыка, в Тебе, Святем Кивоте, якоже рече праведный Давид; явилася еси ширшая небес, поносивши Зиждителя Твоего. Слава Всельшемуся в Тя, слава Прошедшему из Тебе, слава Свободившему нас рождеством Твоим.

Чтение кафизм

Господи помилуй Зр., Слава,
И ныне... читает кафизму в 3 Славы

Малая ектения,

Паки и паки миром Господу помолимся...

По 1-м стихословии, седальны воскресны, глас 7:

Жизнь во гробе возлежаше, и печать на камени надлежаше, яко царя спяща воины стражаху Христа: и Ангели славляху яко Бога безсмертна, жены же взываху: воскресе Господь, подая миру велию милость.

Стих: Воскресни Господи Боже мой, да вознесется рука Твоя, не забуди убогих Твоих до конца.

Тридневым погребением Твоим пленивый смерть, и истлевша человека живоносным востанием Твоим воскресивый Христе Боже, яко человеколюбец, слава Тебе.

Слава, и ныне, Богородичен:

Распеншагося нас ради, и воскресшаго Христа Бога нашего, и низложившаго смерти державу, непрестанно моли Богородице Дево: да спасет души наша.

Господи помилуй Зр., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны воскресны, глас 7

Запечатану гробу, живот от гроба возсиял еси Христе Боже: и дверем заключенным, учеником предстал еси всех воскресение, дух правый теми обновляя нам, по велицей Твоей милости.

Стих: Исповемся Тебе Господи всем сердцем моим, повем вся чудеса Твоя.

На гроб течаху жены, со слезами мвра носяща: и воином стрегущим Тя всех царя, глаголаху к себе: кто отвалит нам камень Воскресе велика совета Ангел, поправый смерть. Всесильне Господи, слава Тебе.

Слава, и ныне, Богородичен:

Радуйся Благодатная Богородице Дево, пристанище и предстательство рода человеческого, из Тебе бо воплотился избавитель мира: едина бо еси Мати и Дева,

присно благословена и препрославлена. Моли Христа Бога мир даровати всей вселенней.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живый во Иерусалиме. Аллилуиа (трижды).

Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Воскресные тропари святого Иоанна Дамаскина:

Благословен еси, Господи, научи мя оправданием Твоим

Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете блистаясь во гробе Ангел мироносицам вещаше: видите вы гроб и уразумейте: Спас бо воскресе от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцыте.

Благословен еси, Господи, научи мя оправданием Твоим

Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскресе от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во едином существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыйся Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 7

Иже наш зрак восприемый, и претерпевый Крест плотски, спаси мя воскресением Твоим Христе Боже, яко человеколюбец.

Степенна, глас 7

Антифон 1

Плен Сионь от лести обратив, и мене Спасе, оживи, изимая работныя страсти.

В юг сеяй скорби постныя со слезами, сей радостныя пожнет рукояти присноживопитания.

Слава: Святым Духом источник Божественных сокровищ, от Негоже премудрость, разум, страх: Тому хвала и слава, честь и держава.

И ныне, тойже.

Антифон 2:

Аще не Господь созиждет дом душевный, всеу труждаемся: разве бо Того ни деяние, ни слово совершается.

Плода чревна, святии духодвижно прозябают отеческая предания, сыноположения.

Слава: Святым Духом, всяческая еже быти имут: прежде бо всех Бог, всех Господство, свет неприступен, живот всех.

И ныне, тойже.

Антифон 3:

Боящиеся Господа, пути живота обретше, ныне и присно ублажаются славою нетленною.

Окрест трапезы твоя, яко стеблие видя исчадия твоя, радуйся и веселися, приводя сия Христови пастыреначальнику.

Слава: Святым Духом глубина дарований, богатство славы, судеб глубина велия: единославен Отцу, и Сыну, служимь бо.

И ныне, тойже.

Прокимен, глас 7: Воскресни, Господи Боже мой, да вознесется рука Твоя, не забуди убогих Твоих до конца.

Стих: Исповемя Тебе Господи всем сердцем моим, повем вся чудеса Твоя.

Господу помолимся — Господи помилуй— Яко Свят еси Боже наш... Аминь.

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — Господи помилуй
Зр

Мир всем - И духови твоему.

От (Матфея или Марка или...) Святаго Евангелия чтение Слава Тебе, Господи, слава Тебе.

Чтение Евангелия.

Слава Тебе, Господи, слава Тебе.

Воскресение Христово видевши, поклонимся Святому Господу Иисусу, единому безгрешному. Кресту Твоему покланяемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.

50 псалом (чтец)

Слава Отцу и Сыну и Святому Духу. Покаяния отверзи ми двери Жизнодавче, утренюет бо дух мой ко храму Святому Твоему, храм носяй телесный весь осквернен: но яко щедр, очисти благоутробною Твоею милостию

И ныне и присно и во веки веков, аминь. На спасения стези настави мя Богородице, студными бо окалях душу грехми, и в лености все житие мое иждих: но Твоими молитвами избави мя от всякия нечистоты.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Множества содеянных мною лютых, помышляя окаянный, трепещу страшнаго Дне Суднаго: но надеяся на милость благоутробия Твоего, яко Давид вопию ти: помилуй мя Боже по велицей Твоей милости.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатыя; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть

день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — Аминь.

Канон воскресный. Глас 7

Песнь 1

Ирмос: Манием Твоим на земный образ преложиися прежде удоборазливаемое водное естество, Господи. Темже немокренно пешешествовав Израиль, поет Тебе песнь победную.

Осудися смертное мучительство древом, неправедною смертию осуждену Ти, Господи: отнюдуже князь тьмы Тебе не одолев, праведно изгнан бысть.

Ад Тебе приближися, и зубы не возмог стерти тело Твое, челюстями сокрушиися. Отнюдуже Спасе, болезни разруш смертныя, воскресл еси тридневен.

Богородичен: Разрешишася болезни праматере Евы: болезни бо избежавше, не-искусомужно родила еси. Отнюдуже яве Богородицу, Пречистая, ведуще Тя, вси славим.

Ин канон Богородице

Бездну рождшая благоутробия, Дево, душу мою озари светоносным Твоим сиянием, яко да достойно воспую Твоих чудес бездну.

Стрелюю греховною уязвлены нас Слово видево, яко Благодетель ущедри: отнюдуже несказанно соединиися, Всечистая, плотию, иже из Тебе Пребожественный.

Ин канон Триоди

Торжества день, востанием Христовым, смерть безвестна показася, жизни возсия заря, Адам востав ликует радостию: темже воскликнем, победную поюще.

Поклонения день Честнаго Креста, приидите к сему вси: востания бо Христова зари, светосияяй предлагает ныне, Того облобызаим душевно радующеся.

Явися великий Господень Кресте, покажи ми зрак Божественный красоты Твоея ныне, достойно поклонника хвалы Твоея: ибо яко одушевленну Тебе, и возглашаю, и облобызаю Тя.

Да восхвалят согласно Небо и земля, яко предлежит всем всеблаженнейший Крест, на немже пригвожден телесне пожресе Христос: Того лобызаим душевно радующеся.

Троицен: О Троице начертаньми! О единице зракомъ! Отче, Сыне, и Душе, единосильная Единице, в совете и хотении, и державы начале, мир Твой сохрани, мир подающи.

Богородичен: Искуса никакоже ведущи мужеска Дево, безсеменно раждаеши Младенца, чисто носиши Рождение, мира Творца Христа Бога: Того моли умирить всяческая.

Катавасиа: Божественнейший прообрази древле Моисей, в Чермнем мори провед Израиля Крестом твоим, воду жезлом пресек, песнь Тебе исходную воспевая Христе Боже.

Песнь 3

Ирмос: В начале Небеса всесильным Словом Твоим утвердей Господи Спасе, и Вседетельным и Божиим Духом, всю силу их, на недвижимем мя камени исповедания Твоего утверди.

Ты возшед на древо, о нас болезнуеши волею, благоутробне Спасе, и терпиши язву, примирения ходатайственну, и спасения верным: еюже Твоему, Милостиве, вси примирихомся Родителю.

Ты мя очистив от язвы, душею уязвленнаго змиевым угрызением, Христе, и показал еси свет, во тьме древле мне слежашу и во тлении: крестом бо во ад сошед, мене совоскресил еси.

Богородичен: Неискусомужныя Твоя Матере мольбами мир мирови подаждь, Спасе, и несказанныя Твоя славы славословящия Тя сподоби.

Ин

Змий поползый из Едема, мене обожения желанием прельстив, верже в землю: но Иже милостив, и естеством благоутробен, ущедрив богосодела, во чрево Твое вселься, и подобен мне быв, Мати Дево.

Благословен плод Твоего чрева, Дево Богородице, всех радости, радость бо всему миру родила еси, и веселие воистинну разгоняющее печаль греховную, Богоневесто.

Ин

Приидите, песнь поим нову, разрушение адово торжествующе: из гроба бо Христос воскрес, смерть пленив, и спасе всяческая.

Приидите, почерпем вернии, не от источника источающего воду тленную, но от источника просвещения, Креста Христова поклонением, о Немже и хвалимся.

Древле егоже прообразоваше Моисей дланьма, Крест Твой ныне облобызающе, умнаго амалика побеждаем, Владыко Христе, Имже и спасаемся.

Очима и устнама чистыма поюще песнь радования, Господню Кресту радости поклонимся вернии, плещуще песньми.

Троицен: Единого в трех ипостасех Бога Безначального чту: нераздельного Существа зраком, Отца, Сына, и Духа живаго, в нихже Крестихомся.

Богородичен: В купине Моисей Твое образно таинство древле Чистая виде: якоже бо оныя пламень, огонь Божества Твою утробу не опали.

Катавасиа: Утверди Владыко Христе Крестом на камени мя веры, не поколебаться уму прилоги врага злаго: Един бо еси свят.

Малая ектения.

Паки и паки миром Господу помолимся...

Седален Триоди, глас 6

Крест Твой, Господи, освятися: в Нем бо бывают исцеления болящим во грехех: Имже Тебе припадаем, помилуй нас.

Стих: Возносите Господа Бога нашего, и покланяйтесь подножию ногу его, яко свято есть.

Днесь пророческое исполнися слово: се бо покланяемся, на место, идеже стоясте нозе Твои Господи: и Древа спасения вкусивше, греховных страстей свободу улучихом, молитвами Богородицы, Едине Человеколюбче.

Слава:

Токмо водрузися древо Христе Креста Твоего, основания поколебашася смерти Господи: егоже бо поглоти желанием ад отпусти трепетом. Явил еси нам спасение Твое Святыи, и славословим Тя Сыне Божий, помилуй нас.

И ныне, Богородичен:

Богородице Дево, моли Сына Твоего пригвождшагося волею на Кресте, и воскресша из мертвых, Христа Бога нашего, спастися душам нашим.

Песнь 4

Ирмос: Отча недра не оставль, и сошед на землю, Христе Боже, тайну услышах смотрения Твоего, и прославих Тя, Едине Человеколюбче.

Своя плещи дав, иже от Девы воплощься, на раны, рабу прегрешившу, биен бывает Владыка неповинен, разрешая моя согрешения.

Предстояв судищу судий законопреступных, яко осудимый повинен бывает, и заушается брэнною рукою, создавый человека яко Бог, и судяй праведно земли.

Богородичен: Яко воистинну Мати Божия, Творца Твоего и Сына моли, к спасительному направить мя пристанищу, Всенепорочная, славнаго Его хотения.

Ин

Избранная вся и добрая, явльшиися Богу прежде создания светлостию, Всепетая, светолитием Твоим поющая Тя просвети.

Бога человеком родила еси, Чистая, воплощенна от чистых кровей Твоих, избавляюща согрешений многих, любовью славящая и почитающа Тя, Мати Дево.

Ин

Се воскресе Христос, мирноносицам женам ангел рече: не рыдайте, шедше рцыте апостолом: радуйтесь, днесь спасение миру, мучительство врага смертию разрушися.

Живоноснаго Твоего Креста, поклонную радость днесь Христе сретающе, предсретение творим Всесвятя Страсти Твоя, Юже во спасение мира соделал еси Спасе, яко Всесилен.

Днесь бывает радость на Небеси и на земли, яко Христово знамение миру является Крест Треблаженный: Сей бо предложен быв, источает кланяющимся Ему радость приснотекущую.

Что Ти принесем Христе, яко честному Кресту дал еси нам поклонитися на Немже всевятая кровь Твоя излися, идеже и плоть Твоя гвоздьми водрузися, Егоже обლობызающе ныне благодарим Тя.

Троичен: Единого Божества пою три ипостаси, нераздельно, естественне просто проповедаю, Отца безначальна, Сына, и Духа святаго сопредстольна, Господство едино, и едино царство, едину державу присносущную.

Богородичен: Единая в женах явилася еси вещь пречудна Чистая, слышание страшное: естество бо Ты обновила еси, без семени рождши, пребывающи паки якоже прежде Дева: родивыйся бо из Тебе, Бог есть истинный. Слава, Христе, пришествию Твоему.

Катавасия: На Кресте Тя Сильне, светило великое видево, трепетом взятыя, лучи сопрятав скры, вся же тварь воспе со страхом Твое долготерпение: ибо исполнися земля Твоего хваления.

Песнь 5

Ирмос: Ночь не светла неверным Христе, верным же просвещение в сладости словес Твоих. Сего ради к Тебе утреннюю, и воспеваю Твое Божество..

За Твоя рабы продаешися, Христе, и по ланите ударение терпиши, свободе ходатайственно поющим: к Тебе утреннюю, и воспеваю Твое Божество.

Божественною Твоею силою, Христе, немощию плотскою крепкаго низложил еси, и победителя мя смерти, Спасе, воскресением показал еси.

Богородичен: Бога родила еси Мати чистая, воплощеннаго из Тебе боголепно, всепетая: понеже не познала еси мужеска пола, но от Святаго раждаеши Духа.

Ин

Лествицу узрев Иаков, к высоте утверждenu, образу научися, неискусобрачная Тебе: Тобою бо Бог человеком приобщися, Всечистая Владычице.

Избавление вечное Тобою, Дево, ныне обретше усердно зовем Ти: еже радуйся, Богоневестная: и Твоим светом возрадовавшися, Всепетая, песнями Тя поем.

Ин

Воссиял еси от гроба незаходимый Свете, миру облистая нетление, потребил еси Господи смертный плачь от конец, яко благоутробен.

Приступим очищеннии воздержанием, тепле обლობызающе во хвалении Древо Всесвятное, на немже Христос распинаемь, спасе мир, яко благоутробен.

Ликують в веселии ангельстии чини, днесь Креста Твоего поклонением: тем бо низложил еси бесовския полки, спасый Христе человечество.

Рай другий познася церковь, якоже прежде Древо имущая живоносное, Крест Твой Господи, из Негоже прикосновением безсмертию причастихомся.

Троицен: Собезначальны Три славлю, единого существа: Бога Отца, Сына, и Духа, свет един трисиятельный, купно державное царство, в неслиянном тождестве.

Богородичен: Родила еси естества законом, но паче закона: Тебе бо единыя безсеменно Рождество, страшный и помышляемый нрав, и глаголемый рождения Твоего, Всенепорочная

Катавасиа: Утренююще Тя воспеваем Спасе щедре, мир обретше Крестом Твоим, имже обновил еси род человеческий ко свету невечернему вводя нас.

Песнь 6

Ирмос: Плавающего в молве житейских попечений, с кораблем потопляема грехи, и душетленному зверю приметаема, яко Иона, Христе, вопию Ти: из смертоносныя глубины возведи мя.

Воспоминаху Тя заключенныя во аде души, и оставльшиися праведных, и от Тебе спасения моляхуся: еже крестом, Христе, подал еси преисподним, пришед яко благоутробен.

Ко одушевленному Твоему и нерукотворенному храму, разрушену бывшу страданьми, воззрети паки лик апостольский отчаяся: но паче надежды поклонься, воскресша повсюду проповеда.

Богородичен: Неизреченнаго рождества Твоего всенепорочнаго образ, Дево богоневестная, иже нас ради, кто от человек сказати возможет Яко Бог неописанне, Слово соединився Тебе, плоть из Тебе бысть.

Ин

Законнии Тя образы, и пророческая проречения яве предвозвещаху, хотящую родити благодетеля, Чистая, всея твари, многочастне и многообразне благодействовавшего верно воспевающих Тя.

Устраншагося древле наветом человекоубийцы, Адама первозданнаго райския божественныя сладости, Неискусобрачная, паки возвела еси, рождши иже от преступления нас избавившаго.

Ин

Воскресл еси смерть упразднив Христе, якоже великий Царь, от адовых сокровищ воззвал еси нас в наслаждение царства Небеснаго, в землю бессмертия.

Плещуще песнями Божественными вернии, воскликнем Богу, Крест Господень целующе: освящения бо источает источник, всем сущим в мире.

Исполняется песнопительный глас: се бо покланяемся пречистых ног Твоих подножию Всесильне, Кресту Твоему честному, тривожденному Древу.

Еже виде Древо в Твой хлеб вложеное, во пророцех рыдатель, Крест Твой Щедре облобызающе, воспеваем Твоя узы, и Погребение, копие же и гвоздя.

На рамах егоже изволил еси Христе носити святыи Крест, и на сем вознестися, и распятися плотию, облобызающе собираем крепость на враги невидимыя.

Троицен: Единицу в Трех начертаниих пою, и Троицу во едином естестве покланяемую, Бога трое купно, Свет Трисолнечный, Отца, и Сына, и Святаго Духа.

Богородичен: Чудес великое чудо в Тебе явися нескверная Агнице, вземлющаго бо мира грех, Агнца родила еси: Егоже моли прилежно о поющих Тя.

Катавасиа: Образ Божественнаго Креста, Иона во чреве китове простертыма дланьма проначерта, и взираше спасен от зверя силою Твоею Слове.

Малая ектения.

Паки и паки миром Господу помолимся...

Кондак Кресту, глас 7:

Не ктому пламенное оружие хранит врат едемских: на тья бо найде преславный союз Древо крестное, смертное жало, и адова победа прогнася. предстал бо еси Спасе мой, вопия сущим во аде: внидите паки в рай.

Икос:

Три Кресты водрузи на голгофе Пилат, два разбойников, и един Жизнодавца. Егоже виде ад, и рече сущим доле: о слуги мои, и силы моя! кто водрузив гвоздие в сердце мое, деревяным мя копием внезапно прободе и растерзаюся, внутренними моими болю, утробою уязвляюся, чувства моя смущают дух мой, и понуждаются изрыгати Адама, и сущия от Адама, Древом данная ми: Дерево бо сия вводит паки в рай.

Песнь 7

Ирмос: Пещь отроцы огнепальну древле росоточашу показаша, Единого Бога воспевающе и глаголюще: превозносимый отцев Бог и препрославлен.

Древом умерщвляется Адам, волею преслушание соделав: послушанием же Христовым паки обновляемь есть. Мене бо ради распинается Сын Божий, препрославленный.

Тебе воскресшаго, Христе, из гроба, тварь вся воспе: Ты бо жизнь сущим во аде процвел еси, мертвым воскресение, иже во тьме, свет препрославленный.

Богородичен: Радуйся, Дщи Адама тленнаго. Радуйся, едина Богоневесто. Радуйся, еюже тля изгнана бысть, яже Бога рождши: Егоже моли, Чистая, спаситися всем нам.

Ин

Преиспещрену, позлащену утварь Тя имущу возлюби Создатель Твой, Дево, и Господь: превозносимый Отцев Бог и препрославлен.

Очищается, Отроковице, уголь древле Исаиа прием: знаменательне Твое рождество виде, превозносимаго Отцев Бога, и препрославлена.

Ин

Воскресл еси из гроба тридневно, яко спяй Господи, адовы вратари поразив Божественною силою, и древния воздвиг праотцы единае благословенный Отцев Боже, и препрославленный.

Цевницею песней ликующе возрадуемь днесь людие крестным поклонением на сем пригвоздившагося Христа славяще, единого благословеннаго Отцев Бога, и препрославленнаго.

Показавый умерщвления орган, жизни делателище, миру облобызательное, Твой Крест Всещедре, Тому поклоняющияся освяти, единае благословенный Отцев Боже и Препрославленный.

Единае Милостиве и Благоутробне, просвети, освяти единае Иисусе, поклоняющияся верно Твоему Кресту, и Божественным страданием, единае благословенный Отцев Боже, и Препрославленный.

Троицен: Единицу в трех ипостасех, пою Божество: Свет бо Отец, Свет Сын, Свет Дух, Свету нераздельну пребывающу, единством естественным, и тремя лучами Лиц сияющу.

Богородичен: Всех пророк многоименитое ты еси проповедание, врата бо Божия, ручка золотая, земля святая, явилася еси Дево Богоневестная, рождшая плотию Иисуса Христа, отцев Бога, и препрославленна.

Катавасиа: Из пламене отроки избавлей, плоть приим пришел еси на землю, и на Кресте пригвожден, спасение нам даровал еси Христе, един благословен Отцев Боже, и препрославлен.

Песнь 8

Ирмос: Неопальная огню в Синаи причащшаяся Купина, Бога яви медленоязычному и гугнивому Моисеови, и отроки ревность Божия три непреборимыя во огни певцы показа: вся дела Господня Господа пойте, и превозносите во вся веки.

Пречистый Агнец словесный за мир заклан быв, престаив яже по закону приносимая, очистив сего кроме прегрешений яко Бог, присно зовуща: вся дела Господня, Господа пойте, и превозносите во вся веки.

Нетленна не сущи прежде страсти, восприятая от Создателя плоть наша, по страсти и воскресении неприкосновенна тлению устройся, и смертныя обновляет, зовущия: вся дела Господня Господа пойте, и превозносите во вся веки.

Богородичен: Твое чистотное и всенепорочное, Дево, скверное и мерзское все-ленные очисти, и была еси нашего примирения к Богу вина, Пречистая: темже Тя, Дево, вся дела благословим, и превозносим во вся веки.

Ин

Светом рождества Твоего, страннолепно вселенную просветила еси, Богородительнице, суща бо воистинну Бога на объятиях носиши Твоих, просвещающа верныя присно зовущия: вся дела Господня Господа пойте, и превозносите во вся веки.

Поем, Чистая, благочестно Твое чрево, Бога вместившее несказанно воплощаема, давшаго всем верным богоразумия просвещение, присно зовущим: вся дела Господня Господа пойте, и превозносите во вся веки.

Ин

Миро в руках что держите всяко кого же взыскуете ныне явлейся юноша во гробе, вопия: воскрес Христос и Бог наш, возставивый естество человеков от адовых сокровищ.

Радуйся требогатое древо и Божественное, Кресте, свете сущим во тьме, четвероконечный мир сиянием Твоим, востания Христова проявлей зари, сподоби вся верныя достигнути Пасху.

В сий день благоухают мира Божественныя мироположницы, живомирственное древо Крест Христов: обоняим его Богодухновенныя вони, Тому поклоняюща верно во веки.

Гряди Елиссее пророче, рцы яве, что Древо оное, еже в воду вложил еси Крест Христов, имже от глубины тли извлекохомся, Тому поклоняюща верно во веки.

Древле Иаков прообразуя Крест Твой Христе, Иосиф поклоняшася Божественнаго жезла краеву, скиптр сей страшный Царствия Твоего предвидев: Емуже ныне поклоняемся верно во веки.

Благословим Отца, и Сына, и святаго Духа, Господа.

Троицен: Едино в трех начертаниих Существо славя, не сливаю единолично Трех, ниже пресецаю зрака, Отца, и Сына, со Духом: един бо над всеми Бог в Троице.

Богородичен: Едина в матерех явилася еси Дева Богоневесто Марие, без мужа родивши Христа Спаса, чистоты знамение сохранивши: Тебе ублажаем вернии во веки.

Хвалим, благословим, поклоняемся Господеви, поюще и превозносяще во вся веки.

Катавасиа: Руце в ров верженный львов, иногда великий во пророцех, Крестообразно простер Даниил, неврежден от сих снеди спасеся, благословя Христа Бога во веки.

Богородицу и Матерь Света в песнях возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатящияся отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

Ирмос: Нетления искушением рождшая, и всехитрецу Слову плоть взаимоотновавшая, Мати неискусомужная Дево Богородице, Приятелище Нестерпимаго, Село Невместимаго Зиждителя Твоего, Тя величаем.

Иже божеству страсть прилагающии, зауститесь вси чуждемудреннии: Господа бо славы плотию распята, не распята же естеством божественным, яко во двою естеству Единого величаем.

Иже телесем востанию неверующии, ко Христову шедше гробу, научитесь: яко умерщвлена бысть, и воскресе паки плоть Жизнодавца, во уверение последнего воскресения, на неже уповаем.

Троицен: Не божеств Троицу, но Ипостасей, ниже единицу Лиц, но Божества чтуще, ссецаем же Сию делящих: сливаем же паки, слияние дерзающих на Сию, Юже величаем.

Ин

Радости нам вечныя Ходатаица и веселия явилася еси Приснодево Отроковице, Избавителя рождши, истиною и Духом божественным Того чтущих, яко Бога избавляющаго.

Поя Давид, Твой праотец, Пречистая, Тя ковчег именует Святыни божественныя, преестественне Бога вместившую, во Отческих Седящаго недрах, Егоже непрестанно вернии величаем.

Ин

Во гроб сошел еси Жизнодавче и Боже, и сокрушил еси вся заклепы же и верей, и мертвыя воскресил еси, слава востанию Твоему, вопиущия, Христе Спасе Всесильне.

Гроб Твой жизнь мне Христе источи, содержай бо жизнь, представ возопил еси живущим во гробех: сущии во узах разрешитесь, Аз бо мира Избавление приидох.

Песньми да възиграют вся древа дубравная, тезоименитое древо Креста зряще облобызаемое днесь: на немже Христос вознесе главу, якоже пророчествует Божественный Давид.

Древом умерый, древо Тя обретох жизни Христоносне Кресте мой, хранителю мой нерушимый, на демоны крепкая державо, Тебе покланяйся днесь зову: освяти мя славою Твоею.

Веселися, радуйся церковь Божия, Древу требогатному покланяющися днесь, всесвятаго Креста Христова: емуже служат чинове ангельстии, и со страхом предстоят.

Троицен: Троице лица, единице естеством покланяюся, Тебе Божество Святое, Отцу, и Сыну, со Святым же Духом, единому началу, единому царству, всеми владычествуещему.

Богородичен: Гора великая в нюже вселися Христос, Ты явилася еси Дево, якоже Божественный Давид вопиет: еюже мы вознесохомся к Небеси, всынившися Духом Всеблаженная.

Катавасиа: О Мати Дево, и Богородице неложная, рождшая безсеменно Христа Бога нашего, на Крест вознесшагося плотию, Тя вернии вси достойно с Ним ныне величаем.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 7 :

Яко взяша Господа, Марии рекшей, на гроб течаства, Симон Петр, и другой таинник Христов, егоже любляше: течаства же оба, и обретоста плащаницы едины внутрь лежаща, и главный же бе сударь кроме их. Темже паки умолчаства, дондеже Христа видеста.

Слава - Триоди

Крест Христов честный днесь предложенный видевшие поклонимся, и верно возвеселимся, облобызающе любовию, на сем волею распеншагося просяще Господа, сподобити всех нас, и Кресту честному поклониться, и достигнути Воскресение неосужденно.

И ныне, Богородисен Триоди

Древу, на немже Всечистая, пречистей длани о нас простре, пригвоздивыйся Сын Твой, ныне благочестно покланяющимся, даждь нам мир, и мироспасительныя всечестныя страсти предварити, и светлой мирорадостной Господоименитой Пасце поклониться, и светноному Дню.

псалом 150-й

Глас 7. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихиры воскресны, глас 6:

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Воскресе Христос из мертвых, разруш смертныя узы: благовести земле, радость велию, пойте Небеса Божию славу.

Стих: Хвалите Бога во святых Его, хвалите Его во утверждении силы Его.

Воскресение Христово видевшие, поклонимся святому Господу Иисусу: единому безгрешному.

Стих: Хвалите Его на силах Его, хвалите Его по множеству величества Его.

Христову воскресению кланяющесе не престаем: Той бо спасл есть нас от беззаконий наших, Святыи Господь Иисус, явлей воскресение.

Стих: Хвалите Его во гласе трубнем, хвалите Его во псалтири и гуслех.

Что воздамы Господеву о всех, яже воздаде нам Нас ради Бог в человецех, за истлевшее естество Слово плоть бысть, и вселися в ны, к неблагодарным, Благодетель: к пленником, Свободитель: ко иже во тьме сидящим, Солнце Правды: на Кресте, безстрастный: во аде, свет: в смерти, живот: воскресение, падших ради. К Немуже возопиим: Боже наш, слава Тебе.

Триоди, глас 4

Стих: Хвалите Его в тимпане и лице, хвалите Его во струнах и органе.

Во гласех воскликнем, в песнях возвеличим, Крест Честный облобызающе, и к Нему возопиим: Кресте Всечестне, освяти наша души и телеса силою Твоею, и от всякаго вреда сопротивных соблюди невреждены, благочестно покланяющиеся Тебе.

Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Приступивше почерпите неистошаемых вод, Креста благодатию проливаемых:

се предлежащее видяще Древо святое, дарований источник, напоеное кровию и водою Владыки всех, на Том волею вознесшагося, и земныя воздвигшаго.

Стих: Возносите Господа Бога нашего, и покланяйтесь подножию ногу его, яко свято есть.

Церкве утверждение, монашествующих похвала и спасение, Ты еси Кресте Всечестне: темже покланяющися Тебе, и сердцем и душою просвещаемся днесь, Божественною благодатию на Тебе Пригвоздившагося, и державу льстиваго разорившаго, и клятву потрельшаго.

Стих: Бог же царь наш прежде века, содела спасение посреде земли.

Во гласех воскликнем, в песнях возвеличим, Крест Честный облобызающе, и к Нему возопиим: Кресте Всечестне, освяти наша души и телеса силою Твоею, и от всякаго вреда сопротивных соблюди невреждены, благочестно покланяющися Тебе.

Слава, глас 8 Триоди

Высокомудраго разума злых фарисеев, всех Господь притчею убежати сего научи: и не высокомудрствовать паче, еже подобает мудрствовать, всех наказа, прописание и образ Сам быв, даже до распятия и смерти, Сам Себе излив. благодаряще убо с мытарем рцем: пострадавый за ны, и безстрастен пребывый Боже, от страстей нас избави, и спаси души наша.

И ныне, глас 2

Преблагословенна еси Богородице Дево, воплощшим бо ся из Тебе ад пленися, Адам возвася, клятва потребися, Ева свободися, смерть умертвися, и мы ожихом. Тем воспевающе вопием: благословен Христос Бог благоволивый тако, слава Тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемтся, славословим Тя, благодарим Тя великия ради славы Твоя.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отець, земляй грехи мира, помилуй нас.

Вземляй грехи мира, приими молитву нашу. Седяй одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхвалю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегах: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святыи Боже, Святыи Крепкий, Святыи Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святой Безсмертный, помилуй нас. Святой Боже, Святой Крепкий, Святой Безсмертный, помилуй нас!

Премудрость! Прости!

Спаси Господи люди Твоя, и благослови достояние Твое, победы православным Христианом на сопротивных даруя, и Твое сохраняя Крестом Твоим жительство (трижды).

Кресту твоему поклоняемся Владыко, и святое Воскресение твое славим. (трижды).

Кресту твоему поклоняемся Владыко, и святое Воскресение твое славим. (трижды).

Стихиры, глас 2

Приидите вернии, животворящему Древу поклонимся, на немже Христос Царь славы волею руке распростер, вознесе нас на первое блаженство, ихже прежде сластию украд враг, изгнаны от Бога сотвори. Приидите вернии, древу поклонимся, имже сподобихомся невидимых враг сокрушити главы. Приидите вся отечествия язык, Крест Господень песнями почтим: радуйся Кресте, падшаго Адама совершенное избавление! О Тебе вернии хвалятся, яко Твоею силою исмаильтеския люди державно покаряющи. Тебе ныне со страхом Христиане целуем: на Тебе пригвоздившагося Бога славим, глаголюще: Господи на Том пригвоздивыйся помилуй нас, яко Благ и Человеколюбец.

Глас 8

Днесь Владыка твари, и Господь славы, на Кресте пригвождается и в ребра прободается, желчи и оцта вкушает, сладость церковная: венцем от терния облагается: покрываяй Небо облаки, одеждею облачится поругания: и заушается брэнною рукою, рукою создавый человека. По плещема биен бывает, одеваяй небо облаки. Заплевания и раны приемлет, поношения и заушения: и вся терпит мене ради осужденнаго, Избавитель мой и Бог, да спасет мир от прелести, яко Благоутробен.

Слава, глас 6

Днесь Неприкосновенный существом, прикосновен мне бывает, и страждет страсти, свобождаяй мя от страстей. Свет подаваяй слепым, от беззаконных устен оплевается, и дает плещи за плененныя на раны. Сего Чистая Дева и Мати на Кресте зрящи, болезненно вещаше: увы мне Чадо мое, что сие сотворил еси красный добротуо паче всех человек, бездыханный, беззрачный являешия, не имея вида, ниже доброты. Увы мне мой Свете! Не могу спяща зрети Тя, утробуо уязвляюся, и лютое оружие сердце мое проходит. Воспеваю Твоя страсти, поклоняюся благоутробию Твоему, Долготерпеливе слава Тебе.

И ныне, глас 6

Днесь пророческое исполнися слово: се бо поклоняемся на место, идеже стоясте нозе Твои Господи: и Древа спасения вкусивше, греховных страстей свободу улучихом, молитвами Богородицы, едине Человеколюбче.

Сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

Просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

АМИНЬ.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь. Господи, помилуй, Господи, помилуй, Господи, помилуй. Благослови.

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется кондак “Взбранной Воеводе” или празднику.